



## Փարիզի ակադեմիայի ռեկտորի այցը

Սույն թվականի նոյեմբերի 3-ին կենտրոնը հյուրընկալեց Փարիզի ակադեմիայի ռեկտոր պարոն Ժիլ Պեկուի գլխավորած պատվիրակությանը Հայաստանում Ֆրանսիայի արտակարգ և լիազոր դեսպան Ժոնաթան Լաքոտի ուղեկցությամբ:



Շրջայցի ընթացքում պատվիրակության անդամները ծանոթացան կենտրոնում դասավանդվող մասնագիտություններին, Ռեսուրս կենտրոնի և Մուլտիմեդիա սրահի գործունեությանը: Հաստատության արդի հագեցվածությունը հնարավորություն է տալիս կազմակերպել նաև այլընտրանքային դասեր, մասնավորապես, հանրակրթական բլոկի առարկաների համար: Մասնագիտական և հանրակրթական առարկաների դասավանդման գործնական և տեսական պայմանները առավել տեսանելի դարձրին կենտրոնի աշխատանքային գործունեությունը, ինչը դրական արձագանք գտավ ռեկտորի և նրա գլխավորած պատվիրակության կողմից:

## Ֆրանսիացի սենատոր Քրիստոֆ Անդրե-Ֆրասսայի այցը

Ֆրանս-հայկական հարաբերությունների հիմքում միշտ էլ ընկած են եղել երկու ժողովուրդների միջև առկա բազմադարյան պատմամշակութային կապերը: Ֆրանսիացի պետական այրերի կողմից կատարվող այցերը առավել խորացնում և ամրապնդում են այս բարեկամական հարաբերությունները:



Այս անգամ կենտրոնի հյուրը պաշտոնական այցով Հայաստանում գտնվող Ֆրանսիայի Հանրապետության Սենատի անդամ պարոն Քրիստոֆ Անդրե-Ֆրասսան էր: Սենատորը շրջայց կատարեց մասնագիտական բոլոր բաժիններում ծանոթանալով կենտրոնում ուսուցանվող մասնագիտություններին, մասնագիտական լաբորատորիաների աշխատանքային գործընթացին:

## Ոսկե աշուն

Կենտրոնում ոսկե աշունը չնուշացավ: Ուսումնական աշխատանքներին զուգահեռ ուսանողները փորձեցին ներկայացնել աշունն իրենց պատկերացմամբ. բարձր տրամադրություն, մեծ խանդավառություն... Այդ օրերին Հայաստանում գտնվող «Ռոն-Հայաստան-Կրթություն-Փոխանակումներ» ասոցիացիայի անդամները կենտրոնի Հոգաբարձուների խորհրդի նախագահ պարոն Լյուկա Մանգանարեսի գլխավորությամբ և տնօրեն Գոհար Գրիգորյանի ուղեկցությամբ շրջայց կատարեցին ուսանողների՝ մրգերով, տերևներով, բերք ու բարիքով լեցուն տաղավարներում:



Աշխատանքները գնահատվեցին հետևյալ չափանիշներով՝ երևակայություն, առատություն, հյուրընկալություն... Գլխավոր և երկրորդ մրցանակները ստացան Դերձակ <-1 և Խոհարար <-2 խմբերը: **Սիրուն աշուն, ոսկեհանդերձ աշուն...**

## Մենք ուժեղ ենք միասին

**Յ**ուրաքանչյուր ազգ, հասարակություն կենսակայուն է իր միասնության, համերաշխության ու համախմբվածության մեջ: Այս գաղափարի կարևորությունն առավել ընդգծվեց «Մենք ուժեղ ենք միասին» միջոցառման շնորհիվ:

Միջոցառմանը ներկա էին նաև այդ օրերին Հայաստանում գտնվող «Ռոն-Հայաստան-Կրթություն-Փոխանակումներ» ասոցիացիայի անդամները:



Հենց այս միասնության շնորհիվ է կենտրոնն ամբողջական, ուժեղ ու լիակատար: Տեղի և սիրիահայ ուսանողների ելույթները հետաքրքիր էին, յուրօրինակ. արևմտահայերենի, արևելահայերենի և ֆրանսերենի հնչեղությունը դարձել էր մեկը մյուսին լրացնող լեզուների շղթա...

Ինտերակտիվ թատրոն, հայրենասիրական երգեր, ֆլեյտա, դիոլ, բանաստեղծություններ... Մենք ուժեղ ենք միասին և միասնաբար ենք կերտելու մեր պատմությունն ու ապագան...

## Պահպանենք բնությունը

**Մ**արդը բնության զավակն է, ապրում է բնության մեջ և բնության միջոցներով: Այդ իսկ պատճառով բնության անաղարտությունը, մանավանդ մեր օրերում, չի կարող չմտահոգել մարդկությանը:

Շրջակա միջավայրի պահպանությանն էր ուղղված ֆրանսերենի դասախոս Լուսինե Աջոյանի կողմից բեմադրված ներկայացումը, որը տեղի ունեցավ բացառապես ֆրանսերեն լեզվով:



Այն հաղորդագրություն էր՝ ուղղված մարդուն՝ պահպանել բնությունը: Պատահական չէ, որ ներկայացման կերպարները՝ հողը, օդը, ջուրը, կրակը, արժևորում էին իրենց կարևորությունը, սակայն, նրանցից յուրաքանչյուրն էլ ունի իր տեղն ու դերը:

Բեմադրությունը համեմված էր գեղեցիկ պարերով՝ եվրոպական ոճի, կերպարները ստացված էին: Այո՛, կենտրոնի ուսանողները խոսում են նաև ֆրանսերեն...

## Ոչ մի քայլ առանց լողազգեստի

**Ժ**ամանակի հետ լողազգեստը դարձել է ավելի կարճ, իսկ դրա վրա ծախսվող կտորը՝ առավել քիչ:

Սակայն, այսօրվա տեսքին հասնելու համար լողազգեստը երկար ճանապարհ է անցել: Տարբեր դարաշրջանների լողազգեստների, նորաձևության, նոր նյութերի և գործվածքի կիրառման գույների ու կտրվածքների բազմազանության մասին էր պատմում «Ոչ մի քայլ առանց լողազգեստի» խորագրով միջոցառումը՝ կազմակերպված Դերձակ Հ-1 խմբի ուսանողների կողմից:



«Տարբեր ձևերի, ոճերի, ավանգարդ գույների լողազգեստները պետք է ընկալել որպես ժամանակի հրամայական», - համոզված են ուսանողները:

Վերջիններիս նպատակն էր ոչ միայն պատմել լողազգեստի անցած ճանապարհի մասին, այլև կոչ անել մարդկանց առավել ժամանակակից լինել և չբարդույթավորվել լողափ գնալիս:



## Երևան՝ սիրո քաղաք...

Այս տարի ևս կենտրոնի ուսանողները մասնակցեցին «Էրեբունի-Երևան 2799» տոնական միջոցառմանը, որը կրում էր «Երևան՝ սիրո քաղաք» կարգախոսը:

Մայրաքաղաքի բնակիչների և հյուրերի համար Երևանի տարբեր հատվածներում տեղակայված բեմահարթակներում կազմակերպվել էին ավանդական դարձած բազմաժանր՝ ռոքի, ջազի, դասական, ազգային երաժշտության համերգային ծրագրեր:



Կենտրոնի ուսանողների ակտիվ մասնակցությունը հարազատ քաղաքի տոնին ողջունելի է և խրախուսելի:



## Կարիերայի և ձեռնարկատիրության տոնավաճառ

Ձեռներեցության համաշխարհային շաբաթվա 2017 թվականի միջոցառումների շրջանակներում «Արմենիա Մարիոթ» հյուրանոցում ԱՄՆ դեսպանատան օժանդակությամբ կայացավ «Կարիերայի և ձեռնարկատիրության տոնավաճառ»:



Վերջինիս հիմնական նպատակն էր ապահովել տեղեկատվություն անձի մասնագիտական կողմնորոշման, կարիերայի պլանավորման և զարգացման հնարավորությունների մասին, մեկ հարկի տակ ներկայացնել կրթության, շարունակական ուսուցման և զարգացման, զբաղվածության ապահովման կառույցները:



Միջոցառմանը մասնակցեցին նաև կենտրոնի ուսանողները՝ ներկայացնելով ուսուցանվող բոլոր մասնագիտությունները վարպետաց դասերի միջոցով: Ողջ օրվա ընթացքում կենտրոնի տաղավարը լի էր այցելուներով:

## Կրթական գործիքների ազգային տոնավաճառ

Կրթական գործիքների տոնավաճառը հարթակ է, որտեղ երիտասարդների հետ աշխատողները կարող են շփվել, փոխանակվել ոչ ֆորմալ կրթության և երիտասարդական աշխատանքի ոլորտի իրենց մեթոդներով, փորձարկել, վերլուծել և ոգեշնչվել նոր մեթոդների ստեղծման համար:



«Կազա» շվեյցարական մարդասիրական հիմնադրամն իրականացրեց Հայաստանում առաջին անգամ անցկացվող «Կրթական գործիքների ազգային տոնավաճառ», որին մասնակցեցին նաև կենտրոնի դասախոսական անձնակազմի որոշ անդամներ: Վերջիններս վերադարձան դասավանդման նոր ու հետաքրքիր մեթոդների իմացությամբ և արդեն իսկ փորձում են կիրառել դասավանդման այլ ընտրանքային մեթոդներ կենտրոնի ուսանողների հետ: